

# Annertuumik innarluutillit ikiorserneqartarnerat pillugu Namminersorlutik Oqartussat nalunaarutaat

Annertuumik innarluutillit ikiorserneqartarnerat pillugu Inatsisartut peqqussutaanni nr. 7-im 3. november 1994-imeersumi kiisalu Inuit annertuumik innarluutillit ikiorserneqartarnerat pillugu Inatsisartut peqqussutaata allannguutaani nr. 10-mi 31. maj 2010-meersumi § 3, imm. 2, § 5, § 8a, § 11, imm. 4, § 12, imm. 4, § 15, § 18, imm. 3, § 20, imm. 2, § 21, imm. 2, § 22, imm. 2, § 25, imm. 3, § 25a, imm. 2 naapertorlugin makku aalajangersarneqarput:

## Kapitali 1

### *Atuuffi aamma nassuaatit*

**§ 1.** Nalunaarutip matuma atuuffigai inuit annertuumik innarluutillit.

**§ 2.** Inuit annertuumik innarluutilittut paasineqartussat tassaapput timimikkut eqqarsartaatsimikkulluunniit ajorunnaarsinneqarsinnaangitsumik nappaateqarnertik, ajoquersimanertik imaluunniit amigaateqarnertik pissutigalugu, piginnaasamikkut annertuumik annikinnerulersitseqqasut. Piumasaqataavoq piginnaasatigut annertuumik annikinnerulersitsineq annertuumik annaasaqarneq imaluunniit inuup ulluinnarni nalinginnaasumik inuuneqarnissaanut aammalu inuup innuttaaqataasut allat assigalugit inuiaqatigiinni peqataanissaanut periarfissanik killiliisumik pilersitsisimassasoq.

*Imm. 2.* Timikkut imaluunniit eqqarsartaatsikkut nappaateqarneq, ajoquersimaneq amigaateqarnerluunniit ataavartuusarpoq, naatsorsuutigisariaqarpat, inuup inuunermi sinnera tamaat timikkut imaluunniit eqqarsartaatsikkut nappaat, ajoquerneq amigaateqarnerluunniit attatiinnassagaa.

**§ 3.** Piginnaasatigut annertuumik annikinnerulersitsineq tassaasarpoq, inuk timikkut imaluunniit eqqarsartaatsikkut nappaateqarneq, ajoquerneq imaluunniit amigaateqarneq pissutigalugu:

1) pisariaqartitaminik nammineq isumagisinnaanngippag, assersuutigalugu timikkut eqqiluisaardeq, atisalersorneq, nerineq assigisaallu,

2) illup iluani silamilu nammineerluni imminut angallassinnaanngippat, matumani niueriarnissaq, allanut pulaarnissaq, nalinginnaasumik sukisaarsaartunut assigisaannullu akuusinnaanissaq eqqarsaatigalugit, imaluunniit

3) inunnut allanut attaveqarsinnaanngippat.

*Imm. 2.* Piginnaasatigut annertuumik annikinnerulersitsineq inunnguuseralugu imaluunniit kingusinnerusukkut timikkut ataavartumik nappaateqalernikkut, ajoquernikkut imaluunniit amigaateqarnikkut pilersimasinnaavoq, assersuutigalugu tappiitsuuneq, isigiarsulerneq, tusilarneq tusillannerluunniit, nukitsigut noqartoortarneq pissutigalugu nukinnik aqutsisinnaannginnej allatulluunniit nukillaarnerit, noqartarneq, oqalunniarnikkut ajornartorsiuteqarneq, timip pisataanik

amigaateqarneq, uummatikkut/taqqatigut/tartukkut/tingukkullu ajoquteqarnerup kingunerisai, gigteqarneq kiisalu kromosomitigut ajoquteqarneq.

*Imm. 3.* Piginnaasatigut annertuumik annikinnerulersitsineq aamma inunnguuseralugu imaluunniit kingusinnerusukkut tarnikkut ataavartumik nappaateqalernikkut, ajoqusernikkut imaluunniit amigaateqarnikkut pilersimasinnaavoq assersuutigalugit nammineq silarsuaqqamiittarneq, eqqarsartaatsikkut ineriartortitsinermik amigaateqarneq, eqqarsartaatsikkut kinguarsimasuuneq, nappaatigalugu isummakkut avissimasutut ilineq.

*Imm. 4.* Piginnaasatigut annertuumik annikinnerulersitsineq napparsimagallarnermik pissuteqarpat nalunaarut manna malillugu ikorsiisoqarsinnaanngilaq.

**§ 4.** Napaatit, ajoqusernerit imaluunniit amigaatit, tamarmik immikkut annikinnerusumik piginnaasatigut annikinnerulersitsut, tamarmik katillutik piginnaasatigut annertuumik annikinnerulersitsisuusinnaapput, § 3, imm. 1-mi piumasarineqartut naammassineqarsimappata.

*Imm. 2.* Napparsimagallarnerit, ajoquersimagallarnerit imaluunniit amigaateqarallarnerit, piginnaasatigut annikinnerulersitseqanermut tamakkiisumik ilangunneqassanngillat.

**§ 5.** Kommunalbestyreli aalajangiissaq, inuup inisisimanera annertuumik innarluutilinnut ilaatinneqassanersoq.

*Imm. 2.* Nakorsap paassisutissiissutai pigineqassapput, taakku tunngavigalugit naliliisoqarsinnaavoq annertuumik innarluutilinnut ilaatinneqassanersoq.

*Imm. 3.* Piginnaasatigut annertuumik annikinnerulersitsinermut upternarsaatit pigineqassapput aamma timikkut tarnikkulluunniit nappaateqarnermut, ajoquersimanermut amigaateqarnermulluunniit upternarsaatit pigineqassallutik.

**§ 6.** Piginnaasatigut annertuumik annikinnerulersitsimaneq illuatungilerniarlugu atortutigut iluaqtissanik ikorsiisoqarsinnaavoq. Ikorsiinerit siunnersuinikkut, ilitsersuinikkut, tapersersuinikkut, paaqqutarineqarnikkut atortutigut assigiinngitsunik ikorsiissutigineqarsinnaapput.

## Kapitali 2

### *Ikorsiinerit*

#### *Atortutigut iluaqtissat*

**§ 7.** Atortutigut iluaqtissat annertuumik innarluutilip ulluinnarni inuuneranut oqilsaataasussat akuersissutigineqarsinnaapput.

*Imm. 2.* Atortutigut iluaqtissat ajornanngippat attartugassatut tunniunneqartassapput.

*Imm. 3.* Atortutigut iluaqtissanik pisiniarnermut aningaasartuutinut taamaallaat ikorsiissuuteqartoqarsinnaavoq, inuit innarluuteqangitsut namminneq atugassaminnik illumilu atugassaminnik pisiarisartagaannut sanilliullugit annertuumik akisunerussuteqarpata.

*Imm. 4.* Atortutigut iluaqtissanut inoqutigiinni nalinginnaasuni nalinginnaasumik atorneqartartunut akuersissuteqartoqarsinnaanngilaq.

**§ 8.** Atortutigut iluaqtissat timip pisataanut iloqissersimasunut amigaataasunulluunniit ornavaffiusut, gerattaqquaasut iluarsiissutaasulluunniit nalunaarut manna malillugu akuersissutigineqarsinnaanngillat.

*Imm. 2.* Taamaallaat atortutigut iluaqtissanik inunnut napparsimmavinni peqqinnissaqarfiulluunniit paaqqutarinnittarifiini uninngasunut immikkullarissutigut akuersissuteqartoqarsinnaavoq.

**§ 9.** Pisortat ilinniarfini ilinniartitsinermi inuit annertuumik innarluutillit peqataanerannut atortutigut iluaqtissanik nalinginnaasunik atugassangortitsinernut nalunaarut manna tunngavigalugu akuersissuteqartoqarsinnaanngilaq.

**§ 10.** Atortutigut iluaqtissanik akuersissuteqarnissamut piumasarineqarpoq, siunnersuisartumit suliamik immikkut ilisimasaqartumit sapingisaq naapertorlugu siumoortumik inassuteqartoqarsimassasoq.

**§ 11.** Atortutigut iluaqtissat §§ 7-10 malillugu akuersissutigineqarsimasut iluarsartinnerannut aserfallatsaalineqarnerannullu akiliussisoqarsinnaavoq, atortutigut iluaqtissat atorneqarsinnaaqqullugit iluarsaanissaq aserfallatsaaliiinssarlu pisariaqartippat.

*Imm. 2.* Pinerit tamaasa kommunalbestyrelsip nalilersortassavaa atortutigut iluaqtissat taarserneqarnissaat imminut akilersinnaanerunnginnersoq.

#### *Annertumik aningaasartuuteqarnerunerit*

**§ 12.** Inuk annertuumik innarluutilik innarluuteqarnereminik pissuteqartumik annertunerusumik aningaasartuuteqartarpat, annertunerusumik aningaasartuutaanerusunut aningaasatigut ikiorsiisoqarsinnaavoq.

*Imm. 2.* Annertunerusumik aningaasartuuteqarnerit pilersinnaapput assersuutigalugu makkunatigut:

1) Angerlarsimaffimmut pequtisinik angerlarsimaffimilu atortussanik allanik pisinermi atortussaq

aalajangersimasoq akisuujusartorlu pisariaqvassisimappat

2) Atisanik skuunillu pisinermi innarluutigisap nassatarisaanik taakkua allanik sukkannerusumik aserfallatsinneqartarpata

3) Nerisassanik immikkullarissunik pisinermi tamanna innarluuteqarnerup pisariaqartippagu, assersuutigalugu sapigaqartuuneq

4) Errorsinermi immikkut aningaasartuutinut

5) Paaqqutarinninnermi aamma eqqiluisaarnermi atortunik pisinermi, soorlu nangit ataasiaannarlugit atortakkat, nangit quiffusinnaasut il.il., peqqinnissaqarfiup tunniunneq ajugai.

6) Taxarernut, najukkami angallassissutit atorsinnaasut allat pigineqanngippata.

*Imm. 3.* Aningaasartuuteqarneruneq nalinginnaasumik aningaasartuutit innarluuteqarnerlu pissutigalugu immikkut aningaasartuuteqarnerit assigiinngissutaat sapingisamik naapertorluginit naatsorsorneqassaaq.

**§ 13.** Aningaasartuuteqarnerunertut taamaallat oqaatigineqarsinaapput, aningaasartuutaanerusoq 500 kr.-nik annertuneruppat.

*Imm. 2.* Aningaasartuutit arallit, katillutik 500 kr.-nik annertunerusut, matussuserlugit aningaasaliiffiqeqarsinnaapput.

*Imm. 3.* Aningaasartuutit ingerlaavartut, ataatsimoorussamik qinnuteqaatigineqartut aningaasartamikkut 500 kr.-nit sinnerlugit amerlassuseqartut matussuserneqarsinnaapput. Ukiutut aningaasartuutit 500 kr.-nit ataallugit annertussuseqartut aningaasaliiffiqeqarsinnaanngillat.

#### *Siunnersortimik ikiorneqarneq*

**§ 14.** Inuk annertuumik innarluutilik pisariaqartitsineq naapertorlugu siunnersortimik ikiorteqarnissaminik pisinnaatitaaffeqarpoq.

*Imm. 2.* Siunnersortimik ikiorneqarnissamik pisariaqartitsineq tassaasarpoq, inuk annertuumik innarluuteqartoq ikiorsiinernut matumani nalunaarummi pineqartunut atatillugu sulisunit atorfekartitanit

naammassineqarsinnaanngitsunut immikkut ittumik siunnersorneqarnissaminik imaluunniit ilitsorsorneqarnissaminik pisariaqartitsisog.

*Inigisap aaqqissuunneqarnera*

**§ 15.** Inuk annertuumik innarluuteqartoq inigisaminik immikkullarissumik aaqqissuussinissamik pisariaqartitsippat, tamatumunnga ikorsiissuteqartoqarsinnaavoq. Inigisap aaqqissuunneranut ikorsiisoqarsinnaavoq, inuk namminerisaminik najugaqarpat, tassani aamma allat ilagalugit najugaqatigiiffik imaluunniit najugaqatigiiffik immikkut nakkutigisaasoq ilaapput, taamaaliornikkut inuk najugaqarfigisamini imminut isumagilersinnaappat.

*Imm. 2.* Inissiami attartortittakkami atortunik nalinginnaasumik pigineqartartunik pisinissamut ikorsiinissamut akuersissuteqartoqarsinnaangilaq.

**§ 16.** Inigisap aaqqissuunneranut ikuinermi ilaatigut pineqarpoq inigisamut isertarfimmut tunngasut, ilaatigut silataani isaarissap tungaanut aaqqissuussinerit assigisaallu.

*Imm. 2.* Aamma inigisamut atatillugu quimik assigisaanilluuniit sananermut ikorsiissutaasinnaavoq, annertuumik innarluuteqartoq atortuminut ilisivissaminik immikkut pisariaqartitsippat, soorlu qamutiminut motoorilimmuit.

**§ 17.** Kommunalbestyrelsip nalilersussavaa, allanngortitassat suut pisariaqarluinnartuuunersut, allanngortitsinermilu aningaasartuutit naatsorsuusiusallugit. Kommunalbestyrelsip sanaartortitsinermi aamma ikuallattoornermi oqartussat allanguiniarnermut akuersissutaat kiisalu inissiamik piginnittup akuersissutaat pissarsiariniassavaa.

*Imm. 2.* Suliap suliarineqarnissaa pillugu isumaqateqarneq aamma suliarineqarneranik nakkutilliineq Kommunalbestyrelsip isumagissavaa.

*Qamutit motoorimik ingerlatillit*

**§ 18.** Qamutit motoorillit, biilit ilanngunnagit, communalbestyrelsimit akuersissutigineqarsinnaapput, annertuumik innarluutilik najugaqarfinni angallassisutinit tamanit ilaaffigineqarsinnaasunit tikinneqarsinnaanngitsuni, matumani taxat ilaapput, najugaqarpat imaluunniit ulluinnarni angalasarpat.

*Imm. 2.* Immikkut pisoqartillugu qamutit motoorillit akuersissutigineqarsinnaapput, biilit ilanngunnagit, naak imm. 1-im piumasarineqartut naammassineqanngikkaluartut.

**§ 19.** Qamutit motoorimik ingerlatillit, communalbestyrelsimit akuersissutigineqarsimasut, communalbestyrelsimit sillimmaserneqassapput. Annertuumik innarluuteqartoq qamutinik taakkuninnga aalajangersimasumik atuisutut nalunaarsorneqassaaq.

**§ 20.** Qamutit motoorimik ingerlatillit, matumani biilit ilanngullugit, allanngortiterneqarnissaannut akuersissuteqartoqarsinnaavoq annertuumik innarluuteqartup qamutit motoorillit taakku allanngortiteeqqaartinnagit atorsinnaanngippagit.

**§ 21.** Qamutinut motoorimik ingerlatilinnut, matumani biilit ilanngunnagit, ingerlatsinermut aningaasartuutinut, soorlu sillimmasiinermut, iluarsaassinermut aamma aserfallatsaaliinermut tamakkiisumik ilaannakortumilluunniit matusissutissanik tapiissuteqartoqarsinnaavoq.

**§ 22.** Biilinut, innarluutilinnut atorneqarsinnaasunngorlugit ikorsiissutaasunut ingerlatsinermi aningaasartuutinut, soorlu sillimmasiinermut, iluarsaassinernut aamma aserfallatsaaliinernut aningaasartuutinut communalbestyrelsip tapiissuteqarnissaanut periarfissaqarpoq.

*Angallassinissamik aaqqissuussinerit*

**§ 23.** Kommunalbestyrelsi inuit annertuumik innarluutillit angallanneqarnissaannut aaqqissuussinermik pilersitsisinnaavoq, tamanna kommuunimi immikkut illuinnartumik pisariaqartinneqarpat.

*Imm. 2.* Angallassinissamik aaqqissuussinermut taamaattumut kommunalbestyrelsi biilimik atugassiissinaavoq. Taamanna aaqqinnejarsinnaavoq peqqinnissaqarfip namminersortu-milluunniit ingerlatsiviup suleqatiginerisigut.

*Imm. 3.* Tamatuma saniatigut inuk annertuumik innarluutilik taxanik angallanneqarnissamut aningaasatigut ikorsiissutinik Kommunalbestyrelsimit tunineqarsinnaavoq.

*Inuit ikorfartortit*

**§ 24.** Inuk annertuumik innarluutilik nammineq inigisamini, aamma ataatsimoorsussamik inissami imaluunniit nakkutigineqarluni inissami, imminut ikorsiinnaajumalluni perorsaanermik sulialimmik ikorfartorteqarnissamik pisariaqartitsisoq, sapaatip akunneranut nal. akunnerini aalajangersimasuni ikorfartorteqartinneqarsinnaavoq.

*Imm. 2.* Kommuunimi inissiamik naleqquttumik allamik neqerooruteqartoqarsinnaanngippat, inuit annertuumik innarluutillit utoqqaat illuanni najugaqartut ikorfartorneqarnissamut tiiminik tunineqarsinnaapput.

**§ 25.** Inuup ikorfartortaasup inuup annertuumik innarluutillip tarnikkut, timikkut aammalu isumaginninnikkut ineriaartorteqqinnissaa suliassaraa.

*Imm. 2.* Ikorfartortip annertuumik innarluutilik ulluinnarni suliassaminik nammineersinnaanissaa equeersimaartumik tapersersussavaa.

*Imm. 3.* Inuk annertuumik innarluutilik 18-it inorlugit ukioqarpat nammineersinnaatitaanngippalluunniit ikorfartortip annertuumik innarluutilik ilagalugu suliassanut atugassaanik kommunalbestyrelsi iliuusissatut pilersaarusiussaaq, ikorfartorti pisariaqarpat suliamik ilisimasallit angajoqqaatut oqartussaassuseqartoq imaluunniit nakkutilliisutitaasoq peqatigalugit. Iliuusissatut pilersaarusiqaq minnerpaamik ukiup affakkaartumik pisariaqartitsineq naapertorlugu nalilersorneqarlunilu aaqqiissuteqarfingineqartassaaq.

**§ 26.** Inuk ikorfartortaasoq kommunalbestyrelsimit atorfinitssineqassaaq, taanna inummut ikorfartortimut sulisitsisutut inisisimasummat.

*Imm. 2.* Kommunalbestyrelsip sapinngisamik inuit perorsaasutut ilinniarsimasut ikorfartortitut atorfinitssittassavai. Tamanna periarfissaqanngippat, komunalbestyrelsip inuit suliamik ingerlatsinissaminnut tunngavissalittut nalilerneqartut atorfinitssittassavai.

*Imm. 3.* Ikorfartortinik akissarsiaqartitsineq Namminersorlutik Oqartussat sulianullu atatillugu kattuffiup ikorfartortit ataasiakkaat ilinniagaqarnermikkut suliaannut atatillugu isumaqatiginninniarsinnaatitaasup akornanni isumaqatigiissut tunngavigalugu pissaaq.

**§ 27.** Inunnut annertuumik innarluutilinnut ataasiakkaanut tamanut nal. akunneri ikorfartorneqarfiusussat amerlassusaat kommunalbestyrelsimit akuersissutigineqartassapput.

*Imm. 2.* Tapersorsorneqarnermut akunnerit nalinginnaasumik qaammatinut arfinilinnut tunniunneqartarput.

**§ 28.** Inuk annertuumik innarluutilik nammineq angerlarsimaffimmini najugaqarpat ulluinnarni paaqqutarineqarneranik isumaginnittoo aningaasarsiaqartinnejqarsinnaavoq. Taamaattorli piumasarineqarpoq, pineqartup taamaaliornermigut nalinginnaasumik isertitaqarsinnaanini tamakkiisumik ilaannakortumilluunniit annaasimassaga.

*Imm. 2.* Nammineq meerarisamik paarsinermut taamaallaat aningaasarsiaqartitsisoqarsinnaavoq, ulluunerani paaqqinniffimi paarsineq periarfissatut naleqqutinngippat.

*Imm. 3.* Kommunalbestyrelsi naliliissaaq, nalunaaquttag akunneri qassit aningaasarsiaqarfiusanersut.

*Imm. 4.* Akigititat SIK-p isumaqatigiissutai malillugit suliamik ilinniagaqanngitsup nal. akunnermusiaatut minnerpaatut amerlassuseqassapput.

#### *Oqilisaassineq*

**§ 29.** Inuk annertuumik innarluutilik nammineq angerlarsimaffimmini najugaqarpat, paaqqutarineqarneralu ilaqtariinnut annertuumik suliassaqartitsineruppat tamatuma oqilisaassiffingeqarnissa kommunalbestyrelsip akuersissutigisinnaavaa.

*Imm. 2.* Oqilisaassineq aatsaat akuersissutigineqarsinnaavoq, annertuumik innarluutilip siunissami paaqqutarineqarnera ilaqtariinnit isumagineqarsinnaappat.

*Imm. 3.* Aammattaaq oqilisaassinermut akuersissuteqartoqarsinnaavoq annertuumik innarluutilik angerlarsimaffimi avataaniinnissamik pisariaqartitsisarpat.

**§ 30.** Oqilisaassineq ilaqtariinni allani, ulloq unnuarlu paaqqinniffimi allamiluunniit taamaaliornissamut naleqquttumi najugaqarallarnikkut pisinnaavoq.

**§ 31.** Najugaqarnermi atugassarititaasut pillugit kommunalbestyrelsit oqilisaassiviusorlu allaganngorlugu isumaqatigiissuteqassapput.

*Imm. 2.* Ilaqtariinnut oqilisaassisunut imaluunniit ulloq unnuarlu paaqqinnittarfimmut namminersortumik ingerlanneqartumut aningaasarsiaqartitsisoqarnissa kommunalbestyrelsip akuersissutigisinnaavaa.

Oqilisaassinerup nalaani aningaasarsiat inuup pilersorneqarneranut aningaasartuutinut ilaanggillat.

*Imm. 3.* Pilersuinermut akiligassat pilersuisussaatitaasumit imaluunniit pilersuisussaatitaasunit akilerneqassapput.

*Imm. 4.* Inuk annertuumik innarluutilik aamma/imaluunniit angajoqqaatut oqartussaanermik pigisaqartoq imaluunniit angajoqqaatut oqartussaagallartoq, inuk annertuumik innarluutilik 18-it ataallugit ukioqarsimappat imaluunniit nammineersinnaassuseqanngippat, aamma ilaqtariit oqilisaassinermi najugaqarfiiit imaluunniit ulloq unnuarlu paaqqinnittarfik namminersorluni ingerlanneqartoq, pineqartup kommunimi najugaqarfiani communalbestyrelsi suleqatigalugu, akunnerminni isumaqatigiissutigissavaat pilersorneqarneranut qanoq iliornikkut akiliisoqartassanersoq.

*Imm. 5.* Pisortanit pigineqartoq ulloq unnuarlu paaqqinnittarfik oqilisaasuuppat taamaallaat pilersuinermut akiliisoqassaaq, takuuk imm. 3.

**§ 32.** Akissarsiassat aalajangersarneqarput:

1) Pilersuineq kr. 52,83 ulloq unnuarlu.

2) Ilaqtariinnut oqilisaassisunut akiliut kr. 1000,00 ulloq unnuarlu

3) Ulloq unnuarlu paaqqinnittarfinnut namminersortumik ingerlanneqartunut akiliut kr. 3180,00 ulloq unnuarlu

*Imm. 2.* Imm. 1-im i akigititatut oqaatigineqartut atuutilissapput 1. Januar 2014. Akigititat aaqqiissuteqarfingeqartassapput Kalaallit Nunaanni Naatsorsueqqissaartarfup pisisartut

aninaasartuutaannut tunngaviusutut pisortatigoortumik nalunaarutaat tunngavigalugit. Atuisunut akigititat pointinik pingasunik allanngortinneqarnerisigut akigititat 3 %-imik iluarsineqartassapput. Juulip aallaqqaataani atuisunut akigititat tunngavigalugit januaarip aallaqqaataani siullermi atuutilersussamik iluarsiiisoqartassaaq.

*Imm. 3. Aningasat iluarsineqarsimasut ukiut tamaasa januarip aallaqqaataani Naalakkersuisut tamanut saqqummiuttassavaat.*

#### *Pikkorissaanerit*

**§ 33.** Annertuumik innarluutillit, ilaquaasut, innarluutilinnut ikiortit allallu pikkorissarneqarnissaannut ikorsiissuteqartoqarsinnaavoq, communalbestyrelsi isumaqarpal pikkorissartitsinermer peqataaneq annertuumik innarluutillip ulluinarni inuuneranut pitsangoriaataasinnaasoq.

**§ 34.** Pikkorissaanermut ikorsiissutinut ilaatinneqarsinnaapput pikkorissartitsinermut akiliutit, angalanermi uninnganermilu aningasartuutit kiisalu sulinikkut isertitassatut annaasanut tamakkiisumik ilaannakortumilluunniit taartisiassat.

*Imm. 2. Sulinikkut isertitassaraluit annaasat uppernarsaatissaqartinneqassapput.*

*Imm. 3. Sulinikkut isertitassaraluit annaasat annerpaafigissavaat PIP-mut isumaqatigiissutit malillugit ilinniarsimasutut atorfinitititap aningasarsiaasa minnerpaaffiat.*

#### *Ilinniagaqarnissamut aamma sulinermut iliuusissatut pilersarusiaq*

**§ 35.** Inup annertuumik innarluutillip meeqqat atuarfianni atuarnini naammassigaangagu ilinniarnerup ingerlaqqinissaanut aamma/imaluunniit sulinerup ingerlanneqarnissaanut, inuk annertuumik innarluuteqartoq aamma/imaluunniit angajoqqaatut oqartussaanermik pigisaqartoq imaluunniit angajoqqaatut oqartussaagallartoq, inuk annertuumik innarluutillik 18-it ataallugit ukioqarsimappat imaluunniit nammineersinnaassuseqanngippat, suleqatigalugit communalbestyrelsip suliarissava ilinniagaqarnissamut aamma/imaluunniit suliamik ingerlataqarnissamut iliuusissatut pilersarusiaq.

*Imm. 2. Kommunalbestyrelsip iliuusissatut pilersarusiaq suliaralugu aallartissavaa atuarnerup naammassinissaa kingusinnerpaamik qaammatinik sisamanik sioqqullugu.*

*Imm. 3. Iliuusissatut pilersarusiaq naammasseriigaq pigineqassaaq atuarnerup naammassineqarnerani ullormi atuarfiusumi kingullerpaami.*

#### *Suliffissaqartitsineq*

**§ 36.** Inummut annertuumik innarluutillimmut, ilinniagaqarnissamik imaluunniit suliffissaqartitsinerup iluani sulinissamik neqeroorfigineqarsinnaanngitsumut, suliassamik tassunga naleqquatumik neqerooruteqarnissaq communalbestyrelsip isumagisinnaasariaqarpaa.

*Imm. 2. Inuk annertuumik innarluutillik ulloq unnuarlu paaqqinnittarfimmi najugaqarpal naleqquatumik sammisassaqarnissaanut neqeroorutissaqarnissaq Naalakkersuisut sapinngisamik isumagissavaat.*

**§ 37.** Sammisaqartitsineq ulluunerani sammisassaqartitsivinni, nakkutigineqarluni sullivinni imaluunniit nakkutigineqarluni suliffinni ingerlanneqartassaaq.

**§ 38.** Inunnut annertuumik innarluutilinnut ulluunerani sammisassaqartitsivinnik, aamma nakkutigineqartumik sullivinnik communalbestyrelsi pilersitsisinnaavoq.

*Imm. 2. Nakkutigineqarluni sullivinnik, ulloq unnuarlu paaqqinnittarfinnut atasunik, Naalakkersuisut pilersitsisinnaapput.*

*Imm. 3. Ulluunerani sammisassaqtitsiviit, nakkutigineqarlunilu sulliit sammisassanik ineriaruutaasunik katsorsaataasunillu neqerooruteqartassapput.*

*Imm. 4. Nakkutigineqarluni sulliit aaqqissunneqarsimassapput inuit annertuumik innarluutillit maskiinanik akuutissanillu navianarsinnaasunik imaluunniit allanik ajoquisiisinnaasunik atuinissaminut periarfissaqarfingisaannik.*

*Imm. 5. Annertuumik innarluutillinnut nakkutigineqarluni sullivinni sammisaqtunut imaluunniit nakkutigineqarluni suliffimmi sulisunut sammissaqartitsinermut aningaasarsianik aningaasarsisitsisoqarsinnaavoq.*

*Imm. 6. Aningaasarsiat annertussusissaat aalajangerneqarpoq nal. akunneranut 15 kr.-ussasoq.*

### *Najugaqatigiiffik*

**§ 39.** Inuit annertuumik innarluutillit 18-it sinnerlugit ukiullit, ulluinnarni ikorfartorneqarnissaminnik pisariaqartitsisut, kisiannili imminnut ima ikorsinnaatigisut perorsaanikkut ulluinnarnilu suliassatigut ikorneqarnissaminnik pisariaqartitsinerat killeqarluni, piginnaasamilli annertuumik annikillisimancerat pissutigalugu imminerisaminnik najugaqarsinnaangitsut, najugaqatigiiffinni inissaannik neqeroorfigineqassapput.

*Imm. 2. Najugaqatigiiffimmi inigisaq sapinngisamik pineqartup kommunimi najugaqarfianiittooq neqeroorutigineqassaaq, sapinngisamik pineqartup angerlarsimaffianut qaninnerpaami.*

**§ 40.** Taakkunannga pisariaqartitsineq naapertorlugu communalbestyrelsi najugaqatigiiffinnik pilersitsissaaq.

*Imm. 2. Naalakkersuisut communalbestyrelsi najugaqatigiiffinnik pilersitsissasoq peqqusinnaavaat:*

- 1) kommuni annertuumik innarluutillinnut 18-it sinnerlugit ukiulinnut marlunnut amerlanerusunullunniit najugaqarfiuppat,
- 2) pineqartut ulluunerani nammineq angerlarsimaffiminni nammineersinnaanngippata, aamma
- 3) pineqartut imminnut akornusersuunnatik najugaqatigiissinnaappata.

**§ 41.** Najugaqatigiiffik najugaqartut namminneq angerlarsimaffiattut isigneqassaaq. Najugaqatigiiffik imatut aaqqissuussaassaaq ineqartut tamarmik immikkut ineeraqassallutik, sapinngisamik namminneq perusuersartarfeqarlutillu uffarfefeqarlutik.

*Imm. 2. Ineqartut ataatsimoorussamik isersimaartarfeqarlutillu igaffeqassapput.*

### *Nakkutigineqarluni najugaqarfik*

**§ 42.** Inunnut 18-inik ukioqalereersimasunut annertuumik innarluutillinnut paaqqutarineqarnissamik ikorfartorneqarnissamillu najugaqatigiiffinni neqeroorutigineqarsinnaasut saniatigut annertunerusumik pisariaqartitsisunut aammalu ulloq unnuarlu ikorfartorneqarnissamik pisariaqartitsisutut naliliiffigisanut, nakkutigineqarluni najugaqarfimmi inissamik neqerooruteqartoqartassaaq.

*Imm. 2. Nakkutigineqarluni najugaqarfimmi inigisaq sapinngisamik pineqartup kommunimi najugaqarfianiittooq neqeroorutigineqassaaq, sapinngisamik pineqartup angerlarsimaffianut qaninnerpaami.*

**§ 43.** Taakkunannga pisariaqartitsineq naapertorlugu communalbestyrelsi nakkutigineqarluni najugaqarfinnik pilersitsissaaq.

*Imm. 2. Naalakkersuisut communalbestyrelsi nakkutigineqarluni najugaqarfilioqqullugu peqqusinnaavaa, kommuni inunnut annertuumik innarluutillinnut 18-it sinnerlugit ukiulinnut marlunnut*

imaluunniit amerlanerusunut, § 42 malillugu nakkutigineqarluni najugaqarfimmi inissaannik neqeroorfigineqartussanut, kommunitut najugaqarfippat.

**§ 44.** Nakkutigineqarluni najugaqarfik najugaqartut namminneq angerlarsimaffattut isigineqassaaq. Najugaqarfik imatut aaqqissuussaassaaq ineqartut tamarmik immikkut ineraqassallutik, sapinngisamik namminneq perusuersartarfeqarlutillu uffarfefeqarlutik.

*Imm. 2. Ineqartut ataatsimoorussamik isersimaartarfeqarlutillu igaffeqassapput.*

*Imm. 3. Ineqarfik aaqqissuussaassaaq sulisunut pigaartuusunut inearalerlugu.*

*Inunnut annertuumik innarluutilinnut ulloq unnuarlu paaqqinnittarfir*

**§ 45.** Inuit annertuumik innarluutillit, nakkutigineqarluni najugaqarfinni paaqqutarineqarnissamik ikorfartorneqarnissamillu neqeroorutinit annertunerusumik pisariaqartitsisut, ulloq unnuarlu paaqqinnittarfimmi najugaqarnissaminnik neqeroorfigineqassapput.

*Imm. 2. Inuit annertuumik innarluutillit ulloq unnuarlu paaqqinnittarfimmi najugaqarnerminni inuit annertuumik innarluutillit ataasiakkaat ikorfartorneqarnissaminnik paaqqutarineqarnissaminnillu pisariaqartitaat naammassineqartassapput.*

**§ 46.** Inunnut annertuumik innarluutilinnut ulloq unnuarlu paaqqinnittarfinni inissat pisariaqartinneqartut pigineqarnersut Naalakkersuisut nakkutigissavaat.

*Imm. 2. Inunnut annertuumik innarluutilinnut ulloq unnuarlu paaqqinnittarfir pilersinnejnarnerini Naalakkersuisut ataqatigiissitsisuullutillu ingerlatsisuussapput.*

**§ 47.** Inunnut annertuumik innarluutilinnut ulloq unnuarlu paaqqinnittarfir aaqqissugaanissaannut tunngatillugu aalajangersakkat atuuttut innersuussutigineqarput.

*Kalaallit Nunaata avataani najugaqarneq*

**§ 48.** Kalaallit Nunaanni najugaqarnissamut tunngatillugu periarfissat nungussimappata, Naalakkersuisut akuersissuteqarnerisigut Kalaallit Nunaata avataanut inissiisoqarsinnaavoq.

*Imm. 2. Kommunalbestyrelsip inassuteqarnera tunngavigalugu akuersissuteqartoqartassaaq.*

**§ 49.** Kalaallit Nunaata avataani inissiinerup ingerlatiinnarneqarnissaanut apeqqut kommunalbestyrelsimit nalilersorneqartassaaq, pissutsit pisariaqartitsinerat malillugu akulikissusilimmik, kisiannili inissiinerup aallartinneraniit minnerpaamik qaammatit aqqaneq marluk qanngiunneranni, ingerlanneqartassallunilu inissiinerup attanneqarnerani. Tamatuma kingorna communalbestyrelsip minnerpaamik ukiumut ataasiarluni pineqartup Kalaallit Nunaannut uternissaanut periarfissat misissortassavai.

*Imm. 2. Kalaallit Nunaanni inissiinissamut naleqquttumik periarfissaqartinnagu angerlartitsinissaq periarfissaqanngilaq.*

*Imm. 3. Angerlartitsinissaq sioqqullugu minnerpaamik sapaatip akunneri 16-inngortinnagit iliuusissatut pilersaarasiaq sananeqareersimassaaq. Iliuusissatut pilersaarasiaq angerlartitsinnginnermi Naalakkersuisunut oqaaseqarfisassatut saqqummiunneqassaaq.*

*immikkut ittumik pisoqarneranut il.il. atatillugu tikeraarluni angalanerit, feeriarluni angalanerit angalanerillu.*

**§ 50.** Annertuumik innarluutilik innarluuteqarnini pissutigalugu najugaqarfisami avataani najugaqartoq ukiumut ataasiarluni najugaqarfimminut tikeraarnissamut ikiorserneqarsinnaavoq. Piumasaqaataavoq, pineqartoq nunagisamini naleqquttumik najugaqarfisinaasaminik neqeroorfingineqarsinnaanginnini pissutigalugu, nunagisami avataani najugaqartuussasoq aamma najugaqarneq pillugu communalbestyrelsi imaluunniit Naalakkersuisut aalajangiisuusimassasut.

*Imm. 2. Angalanermut uninnganermullu aningaasartuutit tamakkiisumik ilaannakortumilluunniit ikorsiissutigineqassapput.*

**§ 51.** Aammattaaq ikorsiissutinut pisariaqartinneqartumik angallassisut angalanerinut najugaqarnerinullu aningaasartuutit ilaatinneqarsinnaapput. Angallassisut, innarluutilimmut ilaquaanngitsut, ullormusiaat, angallassinermi aningaasarsiaat sulinermilu annaasarisinnaasanut taarsiissutit ikorsiissutinik aamma akilerneqassapput.

*Imm. 2. Annertuumik innarluutilik Kalaallit Nunaata avataani najugaqarfisamini sulisumit ingiaqateqartinneqarpat, sulisup pineqartup taarteqartinneranut aningaasartuutit akilerneqarsinnaapput.*

*Imm. 3. Annertuumik innarluutilip tikeraarluni angalanissamini kina ingiaqatigissanerlugu sapingisamik nammineerluni aalajangissavaa. Pineqartoq nammineerluni taamatuminnga aalajangiisinnaanngippat, communalbestyrelsi aalajangiissaq. Tamanna inuk pineqartoq, angajoqqaatut oqartussaasusoq imaluunniit inuk nakkutilliisuititaq, inuk annertuumik innarluutilik nammineersinnaatitaanngippat, kiisalu paaqqinnittarfimmi sulisut suleqatigalugit pissaaq.*

**§ 52.** Angalanissaq annertuumik innarluutilip sapingisamik nammineerluni piareersassavaa, matumani ukiup qanoq ilinerani angalaneq pissasoq kissaatigineqarnersoq ilangullugu aalajangerlugu. Ilaqtariinni pisut immikkut ittut/nalliuottorsiornerit annertuumik innarluutilip peqataaffigissallugit kissaatigisai ataqqineqassapput.

*Imm. 2. Inuup nammineerluni angalanissaq piareersarsinnaanngippagu, inuk pineqartoq, angajoqqaatut oqartussaasusoq, imaluunniit inuk nakkutilliisuititaq, paaqqinnittarfimmiluunniit sulisut kiisalu ilaqtuttat annertuumik innarluutilimmik tikeraartoqartussat suleqatigalugit angalanissamut piffissaq communalbestyrelsimit aalajangerneqassaaq.*

**§ 53.** Inuk annertuumik innarluutilik tikeraarnissaminut atatillugu immikkut tapersersorneqarnissamik pisariaqartitsippat, matumani oqalutseqarnissaq ilangullugu, kommunimi najugaqarfisani communalbestyrelsi tamatumunnga ikorsiissuteqarsinnaavoq, qinnuteqarneq malillugu.

*Imm. 2. Inuit annertuumik innarluutilit Danmarkimiittut eqqarsaatigalugit inuk pineqartoq nammineq paaqqinnittarfimmiluunniit najugarisami sulisut taakkupput, immikkut tapersersuinissat pillugit qinnuteqaateqartussat. Qinnuteqaat taanna Kalaallit Nunaanni kommunimut najugaqarfimmut nassiunneqassaaq.*

**§ 54.** Inuup annertuumik innarluutilip § 50 tunngavigalugu tikeraarsinnaatitaanini atorsinnaanngippagu tassunga taarsiullugu pineqartup qanigisatut ilaquaannginni annertuumik innarluutilimmut pineqartumut tikeraarluni angalanerminut atatillugu aningaasartuutinut ikorsiiffingineqarsinnaavoq

*Imm. 2. Annertuumik innarluutilip nammineersinnaassuseqartup qanigisamisut ilaqtuttani kina tikeraartissatut kissaatiginerlugu sapingisamik nammineerluni aalajangissavaa.*

*Imm. 3. Pineqartoq 18-it inorlugit ukioqarpal angajoqqaatut oqartussaassuseqartoq aalajangiissaq. Inuk pineqartoq nammineersinnaassusiliagaasimappat angajoqqaatut oqartussaassuseqarallartoq*

kommunalbestyrelsi suleqatigalugu aalajangiissaq. Inuk annertuumik innarluutilik aalajangiinermi sapinngisamik annertunerpaamik nammineerluni peqataatinneqassaaq.

**§ 55.** Annertuumik innarluutillit 18-it inorlugit ukiullit ukiumoortumik akiliunneqarlutik tikeraarnissamut suli ataasiarlutik akuereqqinnejarsinnaapput, taamatut angalaneq angajoqqaatut oqartussaassuseqartumut attaveqarnerup ingerlaavartuunissa eqqarsaatigalugu pisariaqarpas. Taamaattorli angalaneq meeqqap katsorsarneqarneranut akornutaatinneqassanngilaq.

*Imm. 2.* Annertuumik innarluutillip 18-it inorlugit ukiullip angajoqqaatut oqartussaassuseqartumut pinnani qanigisatulli ilaqtutamut allamut tikeraarnissani nammineq kissaatigippagu taamatut angalanissaq akuersissutigineqarsinnaavoq. Taamaattorli piumasarineqarpoq angajoqqaatut oqartussaassutsimik tigummisaqartoq tamanna pillugu isumaqataalluni nalunaarsimassasoq.

*Imm. 3.* Annertuumik innarluutillip tamanna nammineerluni kissaatigippagu pineqartup ukiumoortumik akiliunneqarluni tikeraarnissaraluanut taarsiullugu angajoqqaatut oqartussaassuseqartoq qanigisatulluunniit ilaquaasaoq alla akiliullugu innarluutilimmut tikeraartinnejarsinnaavoq. Taamaattorli piumasarineqarpoq, angajoqqaatut oqartussaassutsimik tigummisaqartoq tamanna pillugu isumaqataalluni nalunaarsimassasoq.

**§ 56.** Meeqqat inuuusuttullu annertuumik innarluutillit 16-it 24-llu akornanni ukiullit Danmarkimi najugaqarallartut ukiumut marloriarlutik Kalaallit Nunaannut uterlugulu tikeraartinnejarnissamut pisinnaatitaaffeqarput.

**§ 57.** Annertuumik innarluutilik 18-it inorlugit ukiulik paaqqinnittarfimmut allamut nuuppat pineqartup akiliunneqarluni ukiumoortumik tikeraarnissamut periarfissaata aappaq angajoqqaatut oqartussaassuseqartup paaqqinnittarfimmut nutaamut tassunga tikeraarnissaanut nuunnejarsinnaavoq.

**§ 58.** Angerlarsimaffigisatut najukkamut tikinniarnerup ajornakusoortuunera, ikorsiinissamut atortorissaaruteqarnissamulluunniit periarfissat amigaatigineqarnerat pissutigalugit inuit annertuumik innarluutillit ilaqtutaminnut qanignerpaasaminnut tikeraarsinnaanngippata, taarsiullugu angerlarsimaffigisatut najugarisap qanittuanittumut illoqarfimmut pineqartup, angallassisut qanigisatullu ilaquaanit ataatsip angalanissaat akuersissutigineqarsinnaavoq.

*Imm. 2.* Angalanermut uninnganermullu aningaasartuutit tamakkiisumik ilaannakortumilluunniit ikorsiissutigineqassapput. Aammattaaq ilaquaanatik ingiaqataasunut ullormusiat kiisalu ingiaqataanerminni aningaasarsiaqarsimappata aamma sulinikkut isertitassamikkut annaasaannut matusineq ikorsiissutinut ilaapput.

**§ 59.** Pissutsit immikkut ittut atuutsillugit annertuumik innarluutillit § 50-mi pineqartunut ilaatinneqartut assersuutigalugu qanigisatut ilaqtutapp napparsimarulunneranut, toquneranut ilisaaneranulluunniit atatillugu Kalaallit Nunaanni imaluunniit Kalaallit Nunaannut angalanissamut ikorsinerqarsinnaapput.

*Imm. 2.* Pissutsit immikkut illuinnartut atuutsillugit annertuumik innarluutillip § 50-im i pineqartunut ilaatinneqartup, qanignerpaasaata angalanissaannut ikorsiisoqarnissaa akuersissutigineqarsinnaavoq, assersuutigalugu innarluutillip pingaarutilimmik ullorsiorneranut imaluunniit napparsimarulunneranut atatillugu.

*Imm. 3.* Inuit § 50-mi pineqartunut ilaatinneqartut nunagisami avataaniitillutik toquppata illerfiisa angallanneqarnerinut aningaasartuutit tamakkiisumik ilaannakortumilluunniit matussutissaqartinneqarnissaat akuersissutigineqarsinnaavoq.

**§ 60.** Inuk annertuumik innarluutilik Kalaallit Nunaanni najugaqartoq aamma § 50-mi § 55-milu pineqartunut ilaatinneqanngitsoq nammineq akilikaminik namminerlu suliniuteqarnermigut feriarpas,

angallassisoqartinnani feriarsinnaanani, angallanneqarnissaanut ikorsiissuteqartoqarnissaa  
akuersissutigineqarsinnaavoq.

*Imm. 2. Ingiaqateqarnermut aningaasartuutinut tamakkiisumik ilaannakortumilluunniit ukununnga  
ikorsiissuteqartoqarsinnaavoq:*

- 1) Angalanermut- najugaqarnermut aningaasartuutit.
- 2) Ullormusiat.
- 3) Angalaqataasumut aningaasarsiat.
- 4) Sulinikkut isertitassat annaasat.

*Imm. 3. Inunnut annertuumik innarluutilinnut, 18-inik imaaluunniit taakku sinnerlugit ukioqartunut una  
aalajangersagaq malillugu taamaallaat ukiut pingajussaanni ikorsiissuteqartoqarsinnaavoq.*

*Imm. 4. Inunnut annertuumik innarluutilinnut 18-init inorlugit ukiulinnut una aalajangersagaq malillugu  
ukiut tamaasa ikorsiissuteqartoqarsinnaavoq.*

**§ 61.** § 50, § 55, § 58 § 60-ilu tunnavigalugit tikeraarnermut feeriarlunilu angalanernut  
ikorsiissuteqarneq sivisunerpaamik ullunik unnuanillu qulingiluanik sivisussuseqartunut  
akuersissuteqartoqarsinnaavoq, piffissaq tikeraernerup angalanerulluunniit ulluisa amerlassusii  
apeqqutaatinnagit. Feeriarnerup aallartinnerani naaneranilu angalanermi piffissaq naatsorsuinermut  
ilaatinneqassanngilaq.

### Kapitali 3

#### Allaffissorneq

**§ 62.** Kommunalbestyrelsi annertuumik innarluutilinnut siunnersuinernut, ilitsersuinernut  
tapersersuinernernullu kiisalu ikorsiinikkut suut neqeroorutigineqarsinnaanerinik paasisitsiniaanernut  
ikiutissaaq.

*Imm. 2. Kommunalbestyrelsip nalilissavaa, inuup annertuumik innarluutilip sapinngisamik  
nalinginnaasumik inuuneqarnissaanut suut ikorsiissutissatut aallartinneqassanersut.*

*Imm. 3. Kommunalbestyrelsi kisimiilluni inunnut annertuumik innarluutilinnut ikorsiissuteqarsinnaavoq,  
inatsisitigut ikorsiinissamut periarfissat allat nungussimappata.*

**§ 63.** Atortutigut ikorsiissutit toqqarneqartassapput inuk annertuumik innarluutilik ikorsiissutinik  
tigusaqartussaq suleqatigalugu.

*Imm. 2. Sullisisup suliassaraa inuup annertuumik innarluutilip imaluunniit angajoqqaatut  
oqartussaassusillip imaluunniit angajoqqaatut oqartussaassuseqarallartup, inuk innarluutilik 18-it  
inorlugit ukioqarsimappat imaluunniit nammineersinnaajunnaarsinneqarsimappat, ilisimatinnissaat  
ikorsiissuteqarnerup suna kingunerineraa aammalu toqqagassat suut piunersut, taamaalilluni pineqartup  
ikorsiissutissat toqqarneqartut ilisimaniassammagit.*

**§ 64.** Annertuumik innarluuteqartut ikiorserneqarnissaat pillugu communalbestyrelsimit qinnuteqaatit  
ataasiakkaat tamarmik qinnunneqartup aqqa, najugaa inuttullu normua pillugu paassisutissanik  
imaqartassapput.

*Imm. 2. Ikorsiissutissatut qinnutigineqartup suunera erseqqissumik allassimassaaq. Ikorsiissutissatut  
qinnutigineqartoq katsorsaanermut ilaappat iliuusissatut pilersaarutip suliarineqarsimanera ilanngullugu  
nassiunneqassaaq.*

*Imm. 3. Qinnuteqaat aamma inuup innarluutaanut, piginnaassuseqarneranut, ilinniagaqarsimaneranut,*

inuussutissarsiutanut kiisalu inuttut isumaginninnikkut atugaanut tunngasunik paasissutissanik imaqassaaq.

#### Kapitali 4

##### *Kisitsisitigut paasissutissat*

**§ 65.** Kommunalbestyrelsip kisitsisitigut paasissutissat il.il. suliari savai.

*Imm. 2. Kisitsisinnorlugit paasissutissat imaqarput qanoq ukioqarnermik, arnaanermik angutaanermilluunniit, sumi najugaqarnermik, nappaatip suuneranik, qanga ilanngunneqarsimanermik, ikioriissutinik atuilernermik, qanga akuersissuteqarsimanermik aamma akuersissutip atuuffiata sivisussusianik.*

*Imm. 3. Kisitsisitigut paasissutissat ataavartumik malinnaasinneqassapput Naalakkersuisunullu nassiunneqartassallutik ukiut tamaasa kingusinnerpaamik 1. martsimi.*

*Imm. 4. Naalakkersuisut imm. 3-mi kisitsisitigut paasissutissat nassiunneqartartut saniatigut sukkulluunniit communalbestyrelsi qinnuvigisinnaavaa kisitsisitigut paasissutissanik nassisusseqqullugu, tak. imm. 2.*

*Imm. 5. Naalakkersuisut imm. 2-mi taaneqartut saniatigut sukkulluunniit qinnutigisinnaavai kisitsisitigut paasissutissat allat.*

#### Kapitali 5

##### *Naammagittaalliorssinnaaneq*

**§ 66.** Kommunalbestyrelsip aamma Naalakkersuisut nalunaarut manna malillugu aalajangiineri suliassangorteqqinnejarsinnaapput Isumaginninnermi Naammagittaalliateqartarfimmumt isumaginninnerup aqunneqarnera aaqqissugaaneralu pillugut inatsisartut peqqussutaani aalajangersakkat tunngavigalugit.

#### Kapitali 6

##### *Atuutilerfia*

**§ 67.** Nalunaarut manna atuutilerpoq ulloq 27. juni 2014.

*Imm. 2. Nalunaarut una imm. 1-imi ulloq taaneqartoq malillugu akuersissutinut atorneqassaaq.*

*Imm. 3. Tamatumunnga peqatigitillugu Annertuumik innarluutillit ikiorserneqartarnerat pillugu Namminersornerullutik Oqartussat nalunaarutaat nr. 23 af 30. december 2013-meersoq atorunnaarsinneqarpooq.*

**§ 68.** Tikeraarluni angalanerit, feriarluni angalanerit aamma pisunut immikkut ittunut il.il. atatillugu angalanerit pillugit kapitali 2-mi §§50-61-imi aalajangersakkat aamma atuupput inunnut nalunaarutip matuma atortuulersinneqannginnerani Kalaallit Nunaanni isumaginninnermut oqartussaasunit Danmarkimi innarluutilittut isumagineqartussatut inissinneqarsimasunut, tamatumalu kingorna danskisut siusinaartumik pensionisiaqalersinneqarsimasunut.

Martha Lund Olsen

/

Lene Rohmann Hansen  
konstitueret departementschef

**Namminersorlutik Oqartussat**

Imaneq 4  
3900 Nuuk  
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut